

von Wulf Wager

## Wasser teurer als Milch



In was für ra verrückta Welt lebat mir eigentlich. Hend mir gar koin Reschpekt meh vor dem, was ons nährt ond am Läba erhält? Von was sol-lat onsre Baura läba, wenn des Erzeuga von Milch teurer isch als des, was se drfier kriagat. Die Discounter (auf deutsch: Rontrechner!) hend jetzt da Preis für Milch wieder gesenkt. Molkereia zahlat an die Baura weniger als en Liter Wasser koschtet. Ha wo semmr denn jetzt glandet?

Manche Schwimmbäder ibrlegat scho, ihre Bassins mit Milch zom füllla. No werdat alle Schwoba so schee wia d' Kleopatra.

Da hend d' Leut Kaputschinoaufschäumer für 200,- Euro-na ond Espressovollautomata für 1500,- Euro-na ond holat sich a Milch vom Discounter für 80 Cent. Ja Leut, hend ihr da Knall net ghört? Des isch doch fir wirklich niemand a Problem, 2 Euro für en Liter a'ständig produzierte Milch zom zahla.

A neus Ei-Fon koschtet 800 Euro-na, an neuer Thermomix 1200,- Euro-na. En Liter Milch koschtet 46 Cent, a Kilo Schweinefilet 5,99 ond a Kilo Kartoffla koschtet 99 Cent. Für Statussymbole, dia oft billigscht ond ondr menschao'würdige Omständ produziert werdat, zahlat mr aberwitzige Preise. Aber Lebensmittel, die mr täglich braucht, mecht am liabschta jeder gschenkt!

Wemmr emmr billigere Lebensmittel will, no kan mr net gleichzeitig verlanga, dass die harmonisch mit dr Natur erzeugt werdat. Des isch o'meeglich. D' Leut send oifach bleed. So, wia seller Schüler, der vom Lehrer gfroggt worda isch, warum Kuhmilch Fett enthält. Sei Antwort war: "Damit se beim Melka net quietscht...."

Bis näggschd Woch'

Ihr

Alle Kolumna zom Nochles  
ondr [www.woascht.de](http://www.woascht.de)

ondr em Facebook en dr Gruppe "Schwäbisch schwätza"